



UPA 2015/80

19. marts 2015

Randi Vestergaard Evaldsen

**Uunga siunnersuut: Umiarsualivimmiinnermut aamma umiarsuarni takornarianik angallassisuni ilaasut akileraarutaat pillugit inatsisartut inatsisaata allanngortinneqarneranik Inatsisartut inatsisaat nr. xx, xx. xx 2015-imeersoq.**

(Umiarsuarni takornarianik angallassisuni ilaasut akileraarutaannik aamma ilaasunik nalinginnaasunik takornarianillu angallassinermi ilaasut akileraarutaannik atorunnaarsitsineq)

(Aningaasaqarnermut Aatsitassanullu Naalakkersuisoq)

(Siullermeenera)

Qularutissaanngilaq umiarsuarnut takornarianik angallassisunut akitsuutip unammilleruminaannera nunatsinni takornariaqarnermut akornusiinikummat. Taamaattumik Demokraatini soorunami tapersorsorparput maanna atorunnaarsinneqarmat allanngortillugulu unammilleruminarnerungaartumut umiarsualivimmiinnermut akitsuummik.

Takornariaqarneq ineriartortittuartaqarparput siunissami inuussutissarsiutaassammat angisooq - sanilerput Island qiviarutsigu, taakku takornariaqarnermik ineriartortitsinertik angisuumik iluaqutissarsiviginikuuat. Islandimiut isumassarsiorfigisariaqarpagut, pikkorissuummata aamma akisussaaffimmik tigusinissaminnut qununngimmata ikioqatigiillutillu. Sinaakkutinik pitsaanerpaamik pilersitsisariaqarpugut takornariatitsisartut tunisassiaminnik nioqquteqarnissaminnut periarfissarissaarneruleqqullugit. Maani nunami takornartitsisartut tunisassiaminnik nioqquteqartassappata - taava atuisartut Kalaallit Nunaannut qammartariaqarpagut. Taamaattumik eqqortuliornerusussaavoq umiarsuarnut takornarianik angallassisartunut akitsuutip annikillisinnissaa - inuussutissarsiut pilerinarneruleqqullugu unammillersinnaaneruleqqullugulu.

Taamatulli oqareerluta, pingaaruteqarpoq suliap ilinniutiginissaa. Iluaqutaanngilaq piffissap sivikitsup ingerlanerani iluanaarniarutta piffissaq ungasinnerusoq eqqarsaatigalugu annaasaqaatigisassatsinnik. Matumanimi taamatorpiaq pisoqarpoq. Naalakkersuisuusimasut



naatsorsuutigisimagunarpaat, umiarsuarmut takornarianik angallassisunut akitsuutip qaffangaatsiarnera ajoqutaanavianggitsoq landskarsi aningaasanik amerlanernik pisariaqartitsimmat. Kukkunerli tamanna maannakkut iluarsineqarpoq, akisusimaqaarli, qularnanngilarlu ukiorpaaluit ingerlaqqaassapput umiarsuit takornarianik angallassisartut qangatut amerlatigilernissaannut.

Atagu tigussaasumik eqqaamasatsinnillu assersuuteqalaariarlanga. 2015-mut Aningaasanut Inatsisissatut siunnersuummi Naalakkersuisut siunnersuutigaat konto pingaarnermi 64.10.17-mi "Nunami inuussutissarsiutit takornariartitsinerullu siuarsarnissaanut tapiissutit"-ni Naalakkersuisut siunnersuuteqarput 1,6 millioner koruunit sipaarutigineqassasut. Tamannali Visit Greenlandip sipaarfigineqarneranik kinguneqarpoq taamaasillunilu takornariaqarnermut. Sipaarutigineqartup tamatuma peerneqarnissaa Demokraatini sulissutigissavarput - isumaqaratta, piffissaq ungasinnerusoq isigalugu sipaaruteqarneq nunap aningaasartuutigilerumaaraa. Soorlu umiarsuarnut takornarianik angallassissutinut akitsuut taama kinguneqarsimasoq.

Atagu kukkussutigut ilinniutigeriartigit.

Taamatut oqaaseqarluta siunnersuut ilalerparput innersuussutigalugulu Aningaasaqarnermut Akileraartarnermullu Ataatsimiititaliami suliareqqinneqassasoq.